

## **FIREEMOONA**

### **Fireemoonna Pauroofa akara rumeeqee Fireemoona amaqoo pasafa maridanoo.**

(Fireemoonafa ainaina faqaafa Yisuna ufa irimarufa marinau. Mifa nári miqooqaraasa oosana maraseena faiqí akaqa kudi fasiqauqa feefaurumasee narí ainainiranaki quqaqoosa mariqau. Misakiqari moo fannoo mina auqu Ooneesimusafa mariufanoo moo deedeepamaseenoo darifoo qimaseenoo quqasee Roomma maqusai sandanau. Pauroofa karabusaki Roomma maqusai marunnai finau. Oonuroofanoo Pauroofa mina paqurimandeenoo Yisuna fasaasa ufa qimamufanoo irisoofanoo Pauroofa pasa akara rumamisee aqiqoofanoo kafaannai Fireemoonafa narí uriqararafa marunnai finau. Pauroofa Ooneesimusana dadaaqidanoo maaqi Fireemoona akara rumamaqanau.)

1-2 Oo Fireemoona qinee Pauroosa Yisuna saika ufasaara Roomma maqanna karabusaki marinausa maridaqa Timootifa maasa qikaqa sia rumberanaki marifa kaqi marifa qini dadaaqifaqa ani Fireemoona pasa akara rumamaqaidaqa.

Maasa qiqoondi moodaa ainainiranaki marianafa Fireemoona ani faqa Yisuna ufara ani maaqaki suqi mariasa faqa maasa qisookifa Afiaa

nammarifa faqa maasa Yisuna ufasaara moodaa rakiranara fooraki marifa Arakipusafa faqa inni aiqamausa akara rumannimaqaidaqa.

<sup>3</sup> Anutufa maasa qikoofa faqa karaambaifa asauku mundirafa Yisufa faqa Anutuna afaarirana faqa nari naundura asoarana faqa inniki nimiani.

*Pauroofa Fireemoona andeeqara oosanara amooqidanoo asasidanoo.*

<sup>4</sup> Oo Fireemoona qini qikaqa qinee aiqama kari aniara Anutufinnai innaaru qidaqa dufi dufi qidaqa. <sup>5</sup> Anee karaambaifa Yisuna saqarikiranara faqa Anutuna ufa iri mariasara aidimariannanara faqa maqee maqee iridaqa aniara dufi dufi qidaqa.

<sup>6</sup> Qinee aniara maaqi qimasee innaaru qidaqa. Maasa asauku mundirana faqa moodaa aanna fimariasa amiqi amiqirafa firaafa maridanoo, anee maqee maqee akaqausa faqa Yisuna ufa naida nimiseenana anee maqee maqee mi amiqi amiqirana anoonara irianeera aniara innaaru qidaqa. <sup>7</sup> Oo qini qiqaondi qinee ani oosanara iriqa, anee Anutuna ufa irimariasara amuqusimarifana amiqi amiqidana asasirana nimimariannanara qinee minara iriseeqa qinee faqa asasirana firaana faqa pooduqarana faqa mareeqa.

*Pauroofa Oonesimusanara qimudao qimaseenoo Fireemoona akara aminau.*

<sup>8-9</sup> Asauku mundiranaki maaqanda maridaqa qinee ani afasausa maridaqa paasoosammasee aniara andeeqara oosana maraanneera qimamianee qidaqa sia miqianaura nariara

nariara rirafa didimarifaqa kaqimma iraanaura. Qinee Pauroosa asauku mundirana Yisuna aanaiqikirausa mina ufa akiqara Roomma maqannaasa rumbaranaki marunasa sia qimamianauna kaqimma Ooneesimusanara iraanaura. <sup>10</sup> Qinee maaqoo rumbaranaki marunanoo ani ainainira faiqi Ooneesimusafa aniroofaqa Yisuna aufakiana qimamunanoo Yisuna saqarikifaqa qinee minara qini qimaaku fee qimaseeqa mina akausee qidaqa. Mi fasiqanara aniara iraanaura. <sup>11</sup> Mina auqu Ooneesimusafa mi auquna oosana maaqi qinoo maridanoo amiqimasee ainainira fee qinoo maridanoo. Ani ainainiranaki sia ainainifa doo maqee qini ainainiranaki nari auqu oosana uqeereenoo kaaqa ainainidanoo ani ainainiranaki faqa kaaqa ainainiannoo.

<sup>12</sup> Doo qinee maqee anee ianannai aqiqeeqa nari faqa qeeqa qimuqusa namufaqa aqiqau-nanoo finoo. <sup>13</sup> Anee Fireemoonafa maaqoo maridanau qini aqoondiuga aniraifanau narana aina dadaaqini. Anee sia mariannanara Ooneesimusanara rafaqa fuanee runaisia anee ianannai aqiqaidaqa. <sup>14</sup> Sia qinee mina rafaqafirannai ani dadaaqirana oonu rarisanauna anee anenna kai iriseenana Ooneesimusanara aqiqainanoo oonurandee qinee unnannai aniani. Anee eedoo qina kai kafa maraanauna sia eedoo qinaqa kaqi marianauna.

<sup>15</sup> Nanaree Ooneesimusafa ani saikakiqari quqasee sandanau fee. Anutufa qumeenni fuki faaki qufanoo fee ani saikakiqari aqamasee quqasee maaqoo Roomma maqusai anireenoo

irirana mara maree anirandeenoo naaruara amiqimasee ani faqa marianifeera Anutufa qumee mina aundurai kai saikinoofeeinau. <sup>16</sup> Sia maaqooqari fifau ainainiranaki marifa mariannoo maasa qifaagasaa qikaqa qimuqusimarifa asaku mundiranaki marifa mariannoo. Qinee minara uriqarara ainaina firaafee qidaqa. Doo maqee ani ainainirana faqa ani karaambaiqaki mari akaqaafasaafa faqa marinara ani uriqarara ainaina fira a ainaina mariannoo.

<sup>17</sup> Oo Fireemoona anee qiniara ani faqa moodaannaana fimarunausee qinana qiniara foora Ooneesimusana oonu mareeqee kafa aneenna saikaki quqaa. <sup>18</sup> Indaaru mifa ani mandaikammamaqeenoo fee mifa ani munnimma mareenoo fee mina akiaqara qinee mina amianauro.

<sup>19</sup> Qinee qeeqa qisaukunnai maa akarana ridaqa qimamidaqa qinee Pauroosa mi munnimmana akiaqara ani amianauro. Qinee fifau ani qimamida anee irimariananoo. Qinee marunannara anee mariananoo. (Anee ooqai idaki fimarunaqa qinee ani mareeqee kaqi asumu mariranaki mara quqa amaqaafanausa maridaqa.) <sup>20</sup> Oo qini qikaqaafasaa karaambaiqara irisee amiqi amiqimmaqimaqa, anee asaku mundiranaki marianna qikaqaafasaana aanna ramasee Ooneesimusana kaifaa mareeqee aneenna saikaki quqaa.

<sup>21</sup> Qinee maa pasana akara ridaqa aniara sia qinee iraunna ainainna kai qimiannoo fee qidaqa moo faqa moo faqa qimiannoo fee qidaqa.

<sup>22</sup> Anee maa pasanakinaa ufa irisee Ooneesimusa kafaa quqaidana maaqa deedaqia, qusasaa Anutufa inni innaaru qirana irisee qini iduku-sainaqa anee innannai fuanaura.

*Pauroofa ati rafaafira ufa.*

<sup>23-24</sup> Eepafaraasafa asauku mundirana Yisuna ufa akiaqara qini faqa Roomma maqannaasa rumbaranaki marifa mifa faqa inni nimandaيدانوو qini faqa moodaannaana ainaini mariasa Mareekoofa faqa Aristarakusafa faqa Deemasafa faqa Rukaafa faqa misauqa faqa inni nimandaيداqa. <sup>25</sup> Asauku mundirafa Yisufa karaambaifa mifa kaqi afaarirafa inni aiqamausaki mariani.

**Fúka Moodaanaki Kira Ufa Afaqínaasa Ufa  
Portions of the Holy Bible in the Binumarien  
language of Papua New Guinea  
Buk Baibel long tokples Binumarien long Niugini**

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

---

PDF generated using Haiola and XeLaTeX on 21 Feb 2024 from source files dated 31 Aug 2023

4a891130-f25d-5e30-a81c-882b2e037698